

Rā 5, Te Whakaaturanga o tō tātou Ariki – Rāpare/Tāite i te ata

He Karakia mō ngā Rāpare/Tāite o te "Wā noa iho", o ia rā rānei o te wā o te Whakaaturanga

Nā, ka haere mai ētahi Maki i te rāwhiti ki Hiruhārama, ka mea, "Kei hea tēnei kua whānau nei hei kīngi mō ngā Hūrai? I kite hoki mātou i tōna whetū i te rāwhiti, ā, ka tae mai nei ki te koropiko ki a ia."

Matiu 2.1b, 2

E te Matua i te Rangi

Nā tōu whetū korōria i ārahi ngā tohunga o onamata

Kia tūtaki ki te kīngi o ngā kīngi

E takoto ana i te whare kararehe

Uakina ngā matapihi o te rangi

Kia kite mātou i te tama a te Atua

Me te whakapono

Ko ia tūturu te Karaiti te Tama e tāria nei. **Āmine.**

Te Kupu a te Atua

*Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei, **Korōria ki . . .***

Te Wiki tuatahi, me ngā Rātapu o te Whakaaturanga – Waiata 67

- 1 Mā te Atua tātou e atawhai, māna tātou e manaaki; •
māna e mea kia tīaho tōna mata ki a tātou;
- 2 kia mātauria ai tāu ara ki runga ki te whenua, •
tāu whakaoranga i roto i ngā tauwiwi katoa.
- 3 Kia whakamoemiti ngā iwi ki a koe, e te Atua, •
kia whakamoemiti ngā iwi katoa ki a koe.
- 4 Kia koa ngā tauwiwi, kia waiata i te hari; •
nō te mea ka tika tāu whakawā mō ngā iwi,
ā, ka kāwana koe i ngā tauwiwi o te whenua.
- 5 Kia whakamoemiti ngā iwi ki a koe, e te Atua, •
kia whakamoemiti ngā iwi katoa ki a koe.
- 6 Kua tuku mai nei te whenua i ōna hua; •
ā, ka manaaki te Atua, tō tātou Atua, i a tātou.
- 7 Ka manaaki te Atua i a tātou; •
ā, ka wehi ngā pito katoa o te whenua i a ia.

Te Wiki tuarua, me ngā Rāhina/Mane o te Whakaaturanga – Waiata 99

- 1 Ko Ihowā te Kīngi; kia wiri ngā iwi; •
E noho ana ia i waenganui i ngā kerupima; kia ngāueue te whenua.
- 2 He nui a Ihowā i Hiona; •
kei runga ake ia i ngā iwi katoa.
- 3 Kia whakamoemiti rātou ki tōu ingoa nui, whakamataku. •
He tapu ia!
- 4 E matenui ana hoki te kaha o te kīngi ki te whakawā tika;
ko koe hei whakapūmau i te pono; •
he whakawā tika, he hēkore tāu mahi i roto i a Hākopa.
- 5 Whakanuia a Ihowā, tō tātou Atua; •
koropiko ki tōna tūranga waewae. He tapu ia!
- 6 Ko Mohi rāua ko Ārona i roto i āna tohunga,
me Hamuera i roto i te hunga e karanga ana ki tōna ingoa. •
I karanga rātou ki a Ihowā, ā, whakahoki kupu ana mai ia ki a rātou.
- 7 I kōrero ia ki a rātou i roto i te pou kapua; •
i pupuri rātou i āna whakaaturanga,
i te tikanga i whakatakotoria e ia ki a rātou.
- 8 E Ihowā, e tō mātou Atua, i whakahoki kupu koe ki a rātou; •
he Atua tohu koe i a rātou, otiia, i rapu utu anō koe mō ā rātou mahi.
- 9 Whakanuia ā Ihowā, tō tātou Atua, koropiko atu i tōna maunga tapu; •
he tapu hoki ā Ihowā, tō tātou Atua.

Te Wiki tuatoru, me ngā Rātū/Tūrei o te Whakaaturanga – Waiata 97

- 1 Ko Ihowā te Kīngi, kia hari te whenua, •
kia koa ngā tini moutere!
- 2 Ko te kapua me te pōuri kei ōna taha katoa; •
ko te tika, ko te whakawā, te tūranga o tōna torōna.
- 3 He kāpura e haere ana i mua i a ia, •
ā, pau ake ōna hoariri ā taka noa.
- 4 Mārama tonu te ao i āna uira; •
i kite te whenua, ā, wiri ana.
- 5 Rewa noa ngā maunga, anō he ware pī, i te aroaro o Ihowā, •
i te aroaro o te Ariki o te whenua katoa.
- 6 E whakapuakina ana e ngā rangi tōna tika; •
ā, e kitea ana e ngā iwi katoa tōna korōria.
- 7 Kia whakamā katoa te hunga e mahi ana ki ngā whakapakoko,

- e whakamanamana ana ki ngā atua horihori; •
 koropiko ki a ia, e ngā atua katoa.
- 8 I rongō a Hiona, ā, koa ana; •
 whakamanamana ana ngā tamāhine o Hūrā, e Ihowā, ki āu whakaritenga.
- 9 Ko koe hoki, e Ihowā, kei runga noa ake i te whenua katoa; •
 kua whakanuia koe ki runga noa ake i ngā atua katoa.
- 10 E te hunga e aroha ana ki a Ihowā, e kino ki te hē; •
 e tiakina ana e ia ngā wairua o tāna hunga tapu;
 e whakaorangia ana rātou e ia i ngā ringa o te hunga kino.
- 11 Kua oti te mārama te whakatō mō te hunga tika; •
 me te koa mō te hunga ngākau tapatahi.
- 12 Kia hari ki a Ihowā, e te hunga tika; •
 whakamoemiti ki tōna ingoa tapu!

Te Wiki tuawhā, me ngā Rāapa/Wenerei o te Whakaaturanga – Waiata 21

- 1 Ka hari te kīngi ki tōu kaha, e Ihowā; •
 anō te nui o tōna whakamanamana ki tāu whakaoranga!
- 2 Kua hōmai e koe ki a ia tā tōna ngākau i hiahia ai; •
 kīhai anō i kaiponuhia e koe tā ōna ngutu i īnoi ai.
- 3 Kei mua nei hoki koe i a ia e hōmai ana i ngā manaakitanga o te pai; •
 karaunatia ana e koe tōna mātenga ki te tino kōura.
- 4 He ora tāna i īnoi ai i a koe, •
 ā, kua hōmai e koe ki a ia, he roa noa atu ngā rā ake ake.
- 5 Te nui tōna korōria i tāu whakaoranga; •
 uhia ana ia e koe ki te hōnore, ki te korōria.
- 6 Nāu hoki ia i mea kia manaakitia rawatia ake ake; •
 whakaharitia ana ia e koe ki te koa o tōu mata.
- 7 E whakawhirinaki ana hoki te kīngi ki a Ihowā; •
 e kore anō ia e whakangāueuetia, he atawhai hoki nō te Runga Rawa.
- 8 Ka mau i tōu ringa ōu hoariri katoa; •
 ka mau i tōu ringa matau te hunga e kino ana ki a koe.
- 9 Ka meinga rātou e koe, kia rite ki te oumu kāpura i te wā e riri ai koe; •
 e horomia rātou e Ihowā ina weriweri ia, ā, mā te kāpura rātou e kai.
- 10 Ka whakamōtītia e koe ō rātou hua i runga i te whenua, •
 ō rātou uri i waenganui o ngā tama a te tangata.
- 11 He kino hoki tā rātou i whakatakoto ai mōu,
 he mahi nanakia tā rātou i whakaaro ai, •
 kīhai nei i taea e rātou.

- 12 Mō reira ka meinga e koe kia tahuri ō rātou tuarā, •
ina whakatikaia e koe āu pere i runga i āu aho ki ō rātou mata.
- 13 Kia whakanuia koe, e Ihowā, i runga i tōu kaha! •
Ka waiata mātou, ka hīmene ki tōu nui.

Te Wiki tuarima, me ngā Rāpare/Tāite o te Whakaaturanga – Waiata 29

- 1 Hoatu ki a Ihowā, e ngā tama a te hunga nunui, •
hoatu ki a Ihowā te korōria me te kaha.
- 2 Hoatu ki a Ihowā te korōria e rite ana mō tōna ingoa, •
koropiko ki a Ihowā i roto i te ātaahua o te tapu.
- 3 Kei runga te reo o Ihowā i ngā wai;
e papā ana te whatitiri a te Atua o te korōria; •
kei runga a Ihowā i ngā wai maha.
- 4 Kaha tonu te reo o Ihowā; •
korōria tonu te reo o Ihowā.
- 5 Mongamonga noa ngā hīta i te reo o Ihowā; •
inā, mongamonga noa i a Ihowā ngā hīta o Repanōna.
- 6 Ko ia hei mea i a rātou kia mokowhiti, ānō he kūao; •
a Repanōna rāua ko Hiriona, ānō he kūao kau mākā.
- 7 E wehewehe ana te reo o Ihowā •
i ngā mura ahi.
- 8 Wiri ana te koraha i te reo o Ihowā; •
wiri ana i a Ihowā te koraha o Karehe.
- 9 Whānau ana ngā hāta i te reo o Ihowā,
tīhorea ana ngā ngahere kia tahanga; •
i tōna temepara ko te kupu a te katoa, “Korōria!”
- 10 I noho a Ihowā hei kīngi i runga i te waipuke; •
āe, ka noho a Ihowā hei kīngi, ake ake.
- 11 Ka hōmai e Ihowā he kaha ki tāna hunga; •
he rongu mau tā Ihowā manaaki mō tāna hunga.

Te Wiki tuaono, me ngā Rāmere/Paraire o te Whakaaturanga – Waiata 57

- 1 Tohungia ahau, e te Atua, tohungia ahau,
e whakawhirinaki ana hoki tōku wairua ki a koe; •
āe, ka piri ahau ki raro ki te taumarumarutanga o ōu pākau,
kia pahemo rā anō ēnei mate.
- 2 Ka karanga ahau ki te Atua, ki te Runga Rawa, •
ki te Atua e oti ai āku mea katoa.

- 3 Ka ungā mai e ia he kaiwhakaora mōku i te rangi,
ina tāwai te tangata e mea ana kia horomia ahau; •
Ka ungā mai e te Atua tāna mahi tohu me tōna pono.
- 4 Kei waenganui tōku wairua i ngā raiona; •
e takoto ana ahau i waenganui i te hunga e kāia ana e te ahi;
i ngā tama hoki a te tangata, he tao nei ō rātou niho, he pere,
he hoari koi anō ō rātou arero.
- 5 Kia whakanuia koe, e te Atua, ki runga ake i ngā rangi; •
hei runga atu i te whenua katoa tōu korōria.
- 6 Kua whakatakotoria e rātou he kupenga mō ōku takahanga,
kua piko tōku wairua; •
kua keria e rātou he poka ki tōku aroaro,
ā, taka iho ko rātou anō ki roto.
- 7 Pūmau tonu tōku ngākau, e te Atua, pūmau tonu tōku ngākau; •
ka waiata ahau, āe, ka hīmene ahau.
- 8 E ara, e tōku korōria! E ara, e te hātere, e te hāpa; •
ka ara wawe anō ahau.
- 9 Ka whakamoemiti ahau ki a koe, e te Ariki, i waenganui i ngā iwi; •
ka hīmene ki a koe i waenganui i ngā tauīwi.
- 10 He nui hoki tāu mahi tohu, •
ā tutuki noa ki ngā rangi, me tōu pono ā tutuki noa ki ngā kapua.
- 11 Kia whakanuia koe, e te Atua, ki runga i ngā rangi; •
hei runga i te whenua katoa tōu korōria.

Te Wiki tuawhitu, me ngā Rāhoroi/Hātarei o te Whakaaturanga – Waiata 148

- 1 Whakamoemititia a Ihowā!
Whakamoemititia a Ihowā i runga i ngā rangi; •
whakamoemititia ia i ngā wāhi tiketike!
- 2 Whakamoemititia ia, e āna anahera katoa; •
whakamoemititia ia, e āna mano whāioio!
- 3 Whakamoemititia ia, e te rā, e te marama; •
whakamoemititia ia, e ngā whetū whakamārama katoa!
- 4 Whakamoemititia ia, e ngā rangi o ngā rangi, •
e ngā wai hoki o runga atu i ngā rangi.
- 5 Kia whakamoemititia e rātou te ingoa o Ihowā; •
nāna hoki i whakahau, ā, kua hangā rātou.
- 6 Nāna hoki aua mea i whakapūmau ake ake; •

- i whakatakotoria e ia he tikanga e kore e taka.
- 7 Whakamoemititia a Ihowā, i runga i te whenua, •
e ngā tarakona [taniwha], e ngā rire katoa;
- 8 e te kāpura, e te whatu; e te hukarere, e te kohu; •
e te tūpuhi, e mahi nei i tāna kupu!
- 9 E ngā maunga, e ngā puke katoa; •
e ngā rākau hua, e ngā hīta katoa;
- 10 e ngā kīrehe, e ngā kararehe katoa; •
e ngā mea ngōkingōki, e ngā manu whai pākau!
- 11 E ngā kīngi o te whenua, e ngā iwi katoa, •
e ngā rangatira, e ngā kaiwhakawā katoa o te whenua,
- 12 e ngā taitama, e ngā taitamāhine, •
e ngā koroheke rātou ko ngā tamariki!
- 13 Kia whakamoemititia e rātou te ingoa o Ihowā; •
nōna anake hoki te ingoa e nui ana;
kei runga ake i te whenua, i te rangi, tōna korōria.
- 14 Ko ia hoki te kaiwhakaara o te haona o tāna iwi;
e whakamoemititia ana e āna tāngata tapu katoa;
e ngā tama a Īharaira, e te iwi e tata ana ki a ia. •
Whakamoemititia a Ihowā!

*Waiata Whakamoemiti nā te Kawenata Hou
ko tēnei*

Waiata Whakamoemiti tuatahi

- 1 “Tika tonu, e te Ariki, kia riro i a koe te korōria, •
me te hōnore, me te kaha.
- 2 Nāu hoki i hanga ngā mea katoa, •
ā, nāu i pai i takoto ai aua mea, i hangā ai.”
- 3 “Pai tonu koe, e te Karaiti, i whakamatea hoki koe, •
ā, hokona ana mātou e koe hei hunga mā te Atua ki ōu toto,
- 4 Ā, hokona ana mātou i roto i ngā hapū, i ngā reo,
i ngā huihuinga tangata, i ngā iwi katoa; •
ā, meinga ana rātou e koe hei kīngi, hei tohunga ki tō mātou Atua.”
- 5 “Waiho atu i tēnei e noho nei i runga i te torōna, i te Reme hoki, •
te whakapai, te hōnore, te korōria, te kaha ā ake ake! Āmine!”

Ngā Whakakitenga nā 4.11; 5.9, 10, 13

Korōria ki . . .

ko tēnei rānei

Waiata Whakamoemiti tuarua

- 1 Ko Karaiti Īhu tō tātou Ariki i whakakitea mai i roto i te kikokiko, •
he mea whakatika nā te Wairua,
- 2 i kitea e ngā anahera, •
i kauwhautia nei i roto i ngā tauwiwi,
- 3 I whakaponohia nei i te ao, •
i tangohia atu ki te korōria.
- 4 Māna e whakakite mai ā ōna ake wā, •
ko ia anake nei hoki te Mea kaha, te Mea koa,
te Kīngi o ngā kīngi, te Ariki o ngā ariki.
- 5 Ko ia anake e kore e mate, •
e noho ana ia i te mārāma e kore e taea atu e tētahi;
- 6 Kāhore ia i kitea e tētahi tangata, kāhore anō hoki e āhei kia kitea. •
Waiho atu i a ia te hōnore me te kaha ake ake. Āmine.

1 Timoti 3.16; 6.15, 16

Korōria ki . . .

Ngā Pānui Karaipiture

ko tētahi o ēnei pānui, ko tētahi nō te Maramataka o te tau rānei

Te Wiki tuatahi, me ngā Rātapu o te Whakaaturanga

Nā, ka mea e Ihowā ki a Āperahama, “He pono ka hoki mai anō ahau ki a koe ā te huringa mai anō o te wā; ā, ka whai tama tāu wahine, a Hara.” Nā, ka rongohia atu a Hara i te kūwaha o te tēneti, i muri i a ia. Nā, kua koroheke rawa a Āperahama rāua ko Hara, kua maha ō rāua rā; kua mutu a Hara te pērā me ētahi wāhine. Nā, ka kata a Hara i roto i a ia, ka mea, “Ka rūruhitia nei ahau, ā tērā rānei ahau e whai koa, he koroheke nei anō hoki tōku ariki?” Nā, ka mea a Ihowā ki a Āperahama, “He aha a Hara i kata ai, i mea ai, ‘He pono, ka whānau tamariki rānei ahau, he rūruhi nei hoki ahau?’ He pakeke rawa rānei tētahi mea ki a Ihowā? Kei te tāima i whakaritea, kei te hurihanga mai o te wā, ka hoki mai ahau ki a koe, ā, ka whai tamaiti a Hara.”

Kenehi 18.10-14

Te Wiki tuarua, me ngā Rāhina/Mane o te Whakaaturanga

Nā, me pēhea tā rātou karanga ki a ia, ki te kāhore i whakapono ki a ia? Me pēhea hoki tā rātou whakapono ki a ia, ki te kāhore i rongohia ki a ia? Me pēhea hoki e rongohia ai, ki te kāhore he kaikauwhau? Ā, me pēhea e kauwhau ai, ki te

kāhore e tonoa? Ko te mea ia i tuhituhia, “Anō te ātaahua o ngā waewae o te hunga kawē mai i te rongō whakahari o ngā mea papai!”

Rōma 10.14-15

Te Wiki tuatoru, me ngā Rātū/Tūrei o te Whakaaturanga

Ka mea a Mohi, “Nā, me patu e koe te Kapenga ki a Ihowā, ki tōu Atua, o te kāhui hipi, o te kāhui kau, ki te wāhi e whiriwhiri ai a Ihowā kia waiho tōna ingoa ki reira. Kaua e kainga tahitia te parāoa rēwena me taua mea. Kia whitu ngā rā e kai ai koe i te taro rēwenakore me taua mea, arā i te taro tangihanga; i haere pōtatutatu mai hoki koe i te whenua o Īhipa; kia mahara ai koe ki te rā i puta mai ai koe i te whenua o Īhipa i ngā rā katoa e ora ai koe.”

Tiuteronomi 16.2-3

Te Wiki tuawhā, me ngā Rāapa/Wenerei o te Whakaaturanga

Ka mea a Mohi, “Ka waiho e ahau i tēnei rā te rangi me te whenua hei kaititiro i a koutou, kua hoatu e ahau ki tōu aroaro te ora me te mate, te manaaki me te kanga: nā reira, manakohia te ora, kia ora ai koutou ko ōu uri; aroha ki a Ihowā, ki tōu Atua, whakarongo ki tōna reo, piri atu hoki ki a ia. Ko ia hoki tōu ora, te whakaroanga atu mō ōu rā; kia noho ai koe ki te whenua i oati ai a Ihowā ki ōu mātua kia hoatu ki a rātou, ki a Āperahama, ki a Īhaka, ki a Hākopa.”

Tiuteronomi 30.19-20

Te Wiki tuarima, me ngā Rāpare/Tāite o te Whakaaturanga

Ko te hunga katoa hoki o koutou kua iriiria ki roto ki a te Karaiti, kua kākahuria e koutou a te Karaiti. Kāhore he Hūrai, kāhore he Kariki, kāhore he pononga, kāhore he rangatira, kāhore he tāne, wahine rānei; he tangata kotahi tonu hoki koutou katoa i roto i a Karaiti Īhu. Ā, ki te mea nā te Karaiti koutou, he whānau nā Āperahama, mō koutou hoki te kāinga i runga i te kupu whakaari.

Karatia 3.27-29

Te Wiki tuaono, me ngā Rāmere/Paraire o te Whakaaturanga

Ko koutou ia he iwi whiriwhiri, he tohungatanga kīngi, he iwi tapu, he iwi kua riro pū mai mā te Atua; hei whakapuaki i ngā pai o te kaikaranga i a koutou i roto i te pōuri ki tōna mārāma whakamīharo. I mua ehara i te iwi, ināianeia he iwi nā te Atua: kīhai nei i tohungia i mua, ināianeia ka tohungia.

1 Pita 2.9-10

Te Wiki tuawhitu, me ngā Rāhoroi/Hātarei o te Whakaaturanga

Ka mea a Irāira ki a Eriha, “Tonoa mai, ko te aha e meatia e ahau māu i ahau kīanō kia wehea noatia i a koe.” Anō rā ko Eriha, “Kia rereruatia mai ki ahau te wāhi wairua i a koe nā.” Nā, ka mea tērā, “He mea pakeke tāu i tono mai nā; he ahakoa rā, ki te kite koe i ahau e tangohia atu ana i a koe, ka rite ki tāu nā; ki te kāhore, ka kore e pēnā.” Nā, i a rāua e haere ana, me te kōrero haere, ka puta mai tētahi hāriata ahi me ngā hōiho ahi, ā, wehea ana rāua tokorua; ā, kake ana a Irāia i roto i te tūkauati ki te rangi. Ā, ka kite a Eriha, ka karanga ia, “E tōku pāpā, e tōku pāpā, e ngā hāriata o Īharaira, e ōna kaieke hōiho!”

2 Ngā Kīngi 2.9-12a

Te Waiata a Hakaraia

Kīanga mō ngā rā noa iho

Kua wātea mātou kia koropiko wehi kore atu; •
i runga i te tapu, i te tika, i ngā rā katoa e ora ai mātou.

Kīanga mō te wā o te Whakaaturanga, rānei

Ko tēnei te Karaiti, te mea i whiriwhiri ai mā te Atua, •
te mea i mauria mai he oranga ki ngā iwi o te ao.

Kīanga mō ngā rā o ngā Kaiwhakaako me ngā Kaipānui whakapono, rānei

Ko rātou kua whai whakaaro
kia whiti pīataata rātou e rite ana i ngā rangi; •
me rātou kua whakaakona he maha ngā tāngata i te tika
kia whiti e rite ana i ngā whetū mō ake tonu atu.

Kīanga mō ngā rā o ngā Pīhopa, rānei

Ka hoatu e ahau he hēpara mō koutou, ko āku i pai ai •
ka whāngaia anō koutou e rātou ki te mātauranga, ki te whakaaro pai.

Kia whakapaingia te Ariki, te Atua o Īharaira: •

kua titiro mai hoki ia, kua hoko i tāna iwi.

Kua whakaarahia ake e ia he haona whakaora mō tātou: •

i roto i te whare o Rāwiri, o tāna pononga.

Ko tāna hoki ia i kōrerotia e te māngai o āna poropiti tapu: •

nō te tīmatanga iho anō o te ao:

Hei whakaora i a tātou i ō tātou hoa whawhai: •

i te ringa anō o te hunga katoa e kino ana ki a tātou;

Hei whakaputa i te mahi tohu ki ō tātou tūpuna: •

hei whakamahara ki tāna kawenata tapu;
Ki te oati i oati ai ia ki a Āperahama: •
ki tō tātou tupuna.
Kia tukua mai e ia ki a tātou he ora i te ringa o ō tātou hoa whawhai: •
kia mahi wehikore tātou ki a ia,
I runga i te tapu, i te tika, ki tōna aroaro: •
i ngā rā katoa e ora ai tātou.
Ā, ko koe, e tama, ka kīia ko te poropiti a te Runga rawa: •
e haere hoki koe i te aroaro o te Ariki, hei whakapai i ōna ara;
Hei whakamātau i tāna iwi ki te ora: •
i ō rātou hara e murua ana;
He mea hoki nā te aroha, nā te mahi tohu a tō tātou Atua: •
nā reira hoki i puta mai ai te pūaotanga o runga ki a tātou,
Hei whakamārama i te hunga e noho ana i te pōuri, i te ātārangi hoki o
te mate: •
hei whakatika i ō tātou waewae ki te huarahi o te rangimārie.

Rūka 1.68-79

Kia whakakorōriatia te Matua, te Tama: •
me te Wairua Tapu;
ko te ritenga ia i te tīmatanga, ā tēnei anō ināiane: •
ā ka mau tonu iho, ā ake ake. Āmine.

ko tēnei rānei

Korōria ki te Matua, ki te Tama,
ki te Wairua Tapu; •
mai i te tīmatanga, ki tēnei wā,
ā, haere ake nei. Āmine.

Kiānga anō

Ngā Īnoi

Ngā ĩnoi takawaenga me ngā whakawhetai

E te Ariki, kia aroha mai.
E te Karaiti, kia aroha mai.
E te Ariki, kia aroha mai.

Te Īnoi mō te rā, te Īnoi mō te Rāpare/Tāite, te Īnoi mō te Whakaturanga rānei

Te Īnoi mō te Rāpare/Tāite

E te Atua kaha rawa,
whakakitea mai ana e tāu Tama te nui o tōu aroha whakaora,
i roto i āna tohu me āna mahi whakamīharo;
whakahōutia mai tāu iwi ki tōu aroha noa i te rangi,
ā i roto i ō mātou ngoikoretanga
whakaukukaina mātou ki tōu mana whakahira;
ko Īhu Karaiti tō mātou Ariki.
Āmine.

Te Īnoi mō te Whakaaturanga

E te Atua, nā te tohu o tētahi whetū
koe i whakakite ai i tāu Tama i a Īhu Karaiti ki ngā tauwiwi;
tukua tāu Hāhi kia tīaho hei mārama ki ngā iwi,
kia kite ai te ao katoa
i te ahurei o tōu korōria;
ko Īhu Karaiti tō mātou Ariki.
Āmine.

Te Īnoi a te Ariki

E tatari ana mō te whakakotahi o ngā iwi o te ao, ā,
kua akona nei tātou e tō tātou Ariki, ka Īnoi tātou.

E tō mātou Matua i te rangi

Kia tapu tōu Ingoa.

Kia tae mai tōu rangatiratanga.

**Kia meatia tāu e pai ai
ki runga ki te whenua,**

kia rite anō ki tō te rangi.

Hōmai ki a mātou āiane

he taro mā mātou mō tēnei rā.

Murua ō mātou hara,

Me mātou hoki e muru nei

i ō te hunga e hara ana ki a mātou.

Aua hoki mātou e kawea kia whakawaia;

Ēngari whakaorangia mātou i te kino:

**Nōu hoki te rangatiratanga, te kaha,
me te korōria,**

Ake ake ake. Āmine.

Te manaakitanga

Mā te Atua o te tūmanako,
e whakaū ō tātou ngākau
ki te koa, ki te rangimārie
kia pono ai tātou,
i runga i te ihi, i te mana,
o te Wairua Tapu. Āmine.

I te wā o te Whakaaturanga, ko tēnei rānei:

E te Karaiti, te Tama a te Atua, whakakoatia ō mātau ngākau ki te rongopai
o te Rangatiratanga o te Atua.
Āmine.

Kia whakapaingia te Ariki.
Ki te Atua ia te whakawhetai.